

Rakyat diajak bersikap teguh suburkan perpaduan atas dasar toleransi
Utusan Online
Januari 22, 2012

KUALA LUMPUR 21 Jan. - Perdana Menteri, Datuk Seri Najib Tun Razak menyeru rakyat supaya memperteguhkan semula tekad untuk mempertahankan, mengukuh dan menyuburkan perpaduan nasional secara bertatih berasaskan prinsip toleransi, penerimaan dan meraikan kepelbagaian di dalam masyarakat.

Melalui perutusan Sambutan Tahun Baru Cina 2012 yang dipetik di dalam blognya, *www.1Malaysia.com.my*, Najib berkata, perpaduan nasional boleh dicapai di atas prinsip kesamaan yang lebih besar berbanding perbezaan yang ada di dalam masyarakat.

"Semua kita mendambakan masa depan yang lebih baik untuk diri dan anak-anak kita, oleh itu marilah kita berusaha bersama-sama bagi memastikan masa depan yang sarat harapan untuk semua," katanya.

Najib seterusnya mengucapkan selamat Tahun Baru Cina kepada seluruh rakyat Malaysia yang meraikan perayaan itu dengan harapan Tahun Naga membawa sinar harapan, kebahagiaan dan kemakmuran kepada mereka.

"Marilah kita meneruskan tradisi terbaik warga Malaysia dengan berkongsi sambutan dengan semua kaum.

"Bukalah pintu-pintu kediaman kita kepada semua rakyat Malaysia. Runtuhkanlah tembok-tembok pemisah dan pagar-pagar penghalang dan binalah jambatan penghubung antara hati-hati kita," kata beliau.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2012&dt=0122&pub=Utusan_Malaysia&sec=Dalam_Negeri&pg=dn_02.htm